

四庫全書

集部

欽定四庫全書

集部

堯峰文鈔卷四十三至六

詳校官侍讀學士臣法式善

助教臣常循覆勘

總校官進士臣朱鈐

校對官修撰臣吳錫齡

謄錄監生臣劉澹

欽定四庫全書

堯峰文鈔卷四十三

翰林院編修汪琬撰

古體詩三

共六十三首

汎太湖往游西山

我本謫僊人平居愛幽討暮年向堯峰猶歎所歷少結
東布行滕往問西山道寄身漁艇中馮舷恣長眺浩蕩
連楚越空濛渡雲鳥湖神似識我倍遣風日好孤颿載
斜陽去似輕鷗矯茲山峙中流秀出羣象表居人數千

家炊烟浮樹杪洞天何處所無謁許徑造飛泉界道明
曲徑盤空小行當會諸真因之拾瑤草

游石公山

嘗聞石公山名稱習已熟茲游下筇輿緩步向前麓山
色團暝翠湖光漾晴綠葛花惹衣袂橘刺礙巾幅所遇
石漸奇一一煩寄錄或如城堞連或如屏障曲或平若
几案或方若碁局虛或生天風潤或聚雲族或為猿猱
蹲或作羊虎伏或如兒孫拱或如主賓肅或深若永巷

或邃若重屋色或襍青蒼紋或蹙羅縠累累高復下離
離斷還屬曠或可振衣仄或危容足既疑需斧劈又似
鬼工築不然湖中龍蛻骨堆深谷天公弄狡獪專用悅
人目芳草絡根淺孤松施頂禿敬菴上鼯鼠嵌空縣蝙蝠
翫之漸忘反苦被同游促平生解愛石拜揖每匍匐
急欲買茲山誅茅架椽竹為謀吾已決不假龜策卜

石公石婆

山麓峙兩石俗傳公媼對形容極老蒼不受烟靄媚或

言石有神主此勝絕地相向拱而立端可作嘉配我來
祈石公乞賜風日麗短衣支一策處處探幽異深闢洞
真居窮闕山鬼祕興盡儻告旋更祈檣颿利湖雲必澹
蕩湖水必平駛雖無鴛酒醺庶拜神嘉惠惟虞石不言
未能默相契又疑石無情牝牡竟孰是所沿公媼名俚
妄欠根柢我將辨其誣下語恐辭費

鳳家岡岡在石公山西為勦卿作

石公山下秋風起青楓綠橘秋陰裏居人遙指鳳家岡

一派垂楊弄湖水鳳家閣子湖之濱湖水侵窓化作雲
雲光水色連山翠湖面三山都屬君猶道春紅勝秋碧
鶯能選歌螭能拍明春更蕩蜻蛉舟來賃鳳家岡上宅

林屋洞

自少誦真誥識有幽虛天中藏不死方校定凡幾篇丹
砂凝為牀石髓滴為泉琳花拂雲根藥草紛芊眠來游
若干輩名氏繞壁鐫始入頗偪側稍深益幽妍白蝠大
如鳥嘗撲松明烟別戶久牢扃剝啄空鏗然千年或一

開幸得逢真僊岩巖出絳闕平行分瑤田此境天所閔
值此何由緣我行甚矣憊挾策未能前欲探既瑟縮欲
去仍遷延靈蹤不可見一任樵人傳

過林屋暘谷諸洞至無礙菴小憇因呈同游諸

君子

金庭玉柱人中天靈境本自僊翁傳千年不聞下笙鶴
惟有禪客來安禪我行正值秋景暮疏林橘柚搖輕烟
縈紆細路似蛇繞磽确亂石如羊眠幽禽忽來呀格磔

錦蜨相赴飛翩翹青鞵布襪行復止刺竿喜時陂東偏
低牽綠蘿絡門牖高拄筇竹支櫨椽老衲一二頗撲埜
幸無苛禮煩周旋但燒栗皴作果釘旋取乳溜將茶煎
與君選勝恣馮眺波光鏡朗峰環連山川有靈默相助
爭獻奇秀呈蒼妍况兼風暝日加麗天畀此福非偶然
徑須扳藤蹋濃翠穿盡絕壑窮層顛題名巖石勿草草
再到洞府知何年

銷夏灣

湖雨生綠波數尺秋瀾瀾青蒲間紅蓼動搖微風裏伊
昔吳王時畫舸柳邊樣宮人唱采蓮人花兩相似誰知
千年後緯蕭障流水

龍渚歌

有序

龍渚在銷夏灣有大小二渚予時泛舟觀之遂作此歌
龍公蛻玉騰虛空鱗車魚馬紛乘風玲瓏宮殿鎮無恙
屹然撐住湖心中以石為梁石為礎雨工如羊頻戲舞
陽侯似拒游人游每遣波濤衛門戶作書試投湖龍姑

琅函祕方今有無我將躡浪訪貝闕拄杖借取紅珊瑚
後龍渚歌

石根盤盤凡幾重吞波駕浪疑神工土山壓石石不動
倒插無數青芙蓉竭來沿流繞山腳水花如雪與石搏
斗然迸出雲一縷乖龍挾雨湖中去

予素嗜橘此游辱鳳李雨翁竟日以橘見噉喜
而有作

燕市蒲桃如彈丸鶯梨之實栝于園十年宦游饒此味

飲酣未嚼先流涎獨有洞庭三百顆霜前霜後紅如火
舟車包致殊欠佳夢寐難忘故鄉果秋來湖上風物新
老饕剖盡林間珍清泉沁齒香嚙爪慰殺從前消渴人

題王勤中畫菊勤中有詩及淵明略反其意

黃菊有何好自然多令姿撫我無絃琴為花傾一卮君
勿輕此花頗與小草異饑當餐落英姑置之食事

二物

閒居翫衆物頗覺心境融鼃鼓奏數疊蚓曲鳴三終翠

禽雜采蜨翻翻舞亦工何物敗人意獨有鼠與蠹松鼠
大狡獪下樹捷於風棗栗固不惜任汝穿筠籠奈何敗
吾書其災踰蟲蟲石蠹尤不材釀花有何功惟解近几
案為穴管城中試呼筆公前被嚙幾無鋒二物作過多
於理難姑容驅去潛復來倏忽不知蹤此類大抵然奚
足介心胷一笑且置之高吟倚孤松

禽言

叢木蔽荒邨衆禽晨夕嘯勿疑太啁嘲一一中良規鷓

鵠阻我出似嫌路險巖苦口未及已竹雞復如之架犁
何處來相識勤東菑縣吏嚴催科力作誠難遲提壺則
不然導我訪酒旗一醉銷煩憂勸飲理亦宜是間無佳
客聒耳多羣迷試譯衆禽言欣欣欲忘疲出處固細事
淵明乃吾師且從課農暇先和飲酒詩

邨行見小桃盛開

江杏稍欲闌海棠尚猶斂春光頗寂莫吾意不勝歎徐
行籬落間小桃新吐燄朱顏映日酡絳衰隨風颭結束

一何麗似覺李梅儉黃鸝語謹謹紫蝶來冉冉竹深酒
帘斜賴此增點染勿嫌標格卑此亦未易貶

肩輿登堯峰至露禪菴

卜築堯峰麓時時恣深探高下數里餘曲直頗盡諸奇
石聳危壁飛泉赴幽潭叢篁接空虛偃松碍烟嵐藥花
抽細萼淺紅雜微藍遙見剎竿立知有古佛龕叩門揖
老僧間發世外談為我設蔬具茶清筍簍甘幽境固可
喜名理亦所耽栖止悔已晚奚庸慕華簪

題同宗蛟門百尺梧桐閣畫卷

時蛟門方
受薦舉

病夫抱病堯山下忽枉輕舸訪茅舍入門示我修閣圖
移日卧游不能罷桐華馥馥桐葉大最便涼天與炎夜
江上青山橫檻外竹西翠靄穿林罅主人自是王佐才
要刷修翎騁長駕偶然種植高岡前一片濃陰差碧瓦
擬招佳客共聽雨或許異僧同結夏極知幽興頗不淺
會待名成身得謝石渠天祿正需君縱使據梧殊欠暇
佗時寓直儻思歸但與哦詩評此畫

咏四皓

詩書付一炬
驪山鬼晝哭
獨有希世子
虎口幸免辱
賢哉四老人
相引入深谷
不知祖龍死
況復擠羸鹿
晚節顧大謬
陰受留侯啖
定儲何與汝
母乃蛇畫足
竟墮娥姁奸
幾危卯金族
若無北軍袒
炎火似殘燭
何如種桃人
但解守耕牧
年年武陵溪
桃花紅簇簇

堯峰讀書五首

我無宦游才
中歲寄一命
回翔執戟郎
失轡憂蹭蹬
嗷

吸寮友間常恐蹋機穽幸然賦歸來久矣杜干請生冢
亦已卜但未下窆塋功名尚何言為君付墮甌

自少耽詩筆鉢心擢胃賢文章一小技幾受壯夫哂遲
暮翫遺經庶幾改前軫願以所得餘講說被童貳東家
章句生所得略矛盾恪守先正言吾其謝不敏

昔我先大夫早被京兆薦著述鄙小儒往往貫箋傳賦
命胡不延識者每嗟喧羈貫奉遺書稍愛趨筆硯踰
三紀餘手澤猶未散家學詎易承勉旃紹編繕

日者文格衰剝，剝見瑕癥，類以鼃黽鳴仰，欲希鈴鑾歸王。逝不作敢望，柳與韓嗟予異流俗嗜。好區鹹酸端坐，諷六經要使正氣完。諸子且撥置，卑之況稗官。

百金置石田，十金置茅榭。潛郎荷

主恩，甫病即得謝。所慙膏腳衰無力，事躬稼，屣步攜一編出門。蔭桑柘，稍值會，心境高吟遠。旁舍勿為渴，叻憂鄰漿，幸容借。

連日酷暑，近晚稍得風，是夕遂雨。

赤日行中天炎炎一何烈衰羸固難支況復嬰毒熱乘
間入肝脾自分那得活姑以靜勝之躁心戒妄發昨宵
月離畢茲晨螳遷穴幸甚天將陰快雨起蘋末微涼襲
枕簟高卧亦已決風伯洵可人俾我寬消渴

龍挂

樹頭淅淅少女風鳥聲謹鳴檐角東亂雲潑墨四面起
白痕一綫橫其中道旁行人指龍挂吾亦仰首覘長空
片鱗隻爪杳莫覩惟見蜿蜒修尾穿迷濛電光煜煜雷

隆隆雨點竟與飛電同路窪驟漲水一尺屋滿疑捲茅
三重人言此龍壞世界諺語近誣吾不從未論甘澍慰
農舍先喜快涼蘇病翁

訪云黑龍壞世界
白龍護世界故云

家人以病者請禱作此曉之

家有病熱者往往語言嚙舉室共驚勞雜延醫巫至或
云鬼求食或曰風為癘衆說頗紛紛未知果誰是從來
本儒素豈暇崇淫祠稍習黃農書湯劑固應議藥物與
牲鷄二者均一費神姦何能為治之以不治

王師南下有作

擬金伐鼓聲謹闐陸馳鐵騎川樓船

王師赫濯自天降鼠子何路求生全試約長繩各千尺
縛取羣凶須努力五等封爵不負人諸公勿徒口擊賊

出門志感四首

兩兒如案長相顧牽別袂阿翁方暮年此去殊謬計
顏拊兩兒丁寧勿嬉戲誦讀良須勤農圃亦當議但使
饘粥充勉旃孝友事名利非所期吾道固如是

安車與蒲輪古人誕語爾纁帛亦何有符檄動盈紙縣吏恣喧呼敦迫乃至此鰥鶴猶震驚何況赤腳婢擔簦挈囊衣嗟哉豈得已虛名解誤人貽悔當沒齒

老屋差可居蠹書差可讀稍暇乞一枕高卧何妨熟茲游頗意外畫蛇為之足勉爾荅辟書夫豈夙所欲故輟諒難改行見不遠復殷勤屬館人慎勿毀薪木

學書故無益學劍非其流人生衣食耳餘事皆贅疣條桑朝飮蠶刈芻暮飯牛田父誠我師可免凍餒憂舍此

欲何之母乃非良謀咄哉遠行客三歎懷林邱

泰安行宮

俗祀所謂碧霞元君土人呼為娘娘

泰山府君見稗史制人魂魄操生死冕旒廟貌殊儼然
胡為舍此趨淫祀元君殿宇侵山岡焚香翁姥紛相望
琵琶聲繅牲酒熟府君屈作兒女裴少姨小姑與此類
千年土偶真兒戲漢家天子廢東封是處行宮吁可異

送黃俞邵聞訃南歸三首

朔風吹枯條雨雪方霏霏游子策蹇南血淚霑麻衣創

巨痛亦深入門何所依素帷空飄揚瓦鐙慘不燐

伊昔別高堂牽裾不能止山川慎跋涉丁寧頗媿媿十
指瘳見骨動勞結行李距此曾幾時音容今已矣

豈不懷倚閭承謹茲升斗祿養顧未逮遺恨積山阜所
期揚令名逝者斯不朽忠孝非殊途勉旃兩無負

懷故山

往者山居時把茅僅覆首積垣繫文石小徑編檉柳位
置麤得宜山色落吾手自從辱弓旌待命闕門久諸公

悉雄才自顧獨老醜辟若宮縣中雜以一土缶何當蒙
放罷戴高而履厚騎驢出輒土放船逐晴瀏二月草如
茵三月花如綬往來故山間常得招鄰家黃肥邨社雞
白醪市樓酒葵菜與蓴絲一一可饒口浩歌金石鳴醉
墨龍蛇走不知鐘鼎食能敵此樂否計之亦已熱浮名
信何有敢向康衢剪蠅營復狗苟

讀書

龍鍾五十五髣髴如華顛崇朝手殘書移日即茫然回

憶羈貫初駿快頗翩翩過目了大義少選竟一編倍誦
若瀉水不受長者鞭因之易驕惰研習未宜專誰知老
將至意象衰於前力學誠上策有志無其年夜闌燭跋
短餘光豈遷延身非袁伯業撫卷慙先賢

旅中有感

平子賦歸田此事已千古時賢戀組紱往往老塵土吾
意頗恥之決策返農圃故廬非褊小几杖絕楚楚坐隅
列諸生上席延堊父掀顙及抵掌狂語非不吐麥飯盛

瓦盆菰羹輟土釜以此助盤桓其味勝脩脯摛身利名
場得失略相補區區誓墓心豈因一懷祖

題垂竿圖

身上短簑苔樣綠偶來停擢垂楊曲鯨魚吹浪上蘋花
乘興馱針殊不俗輕風搖曳酒家旗兩岸游人歌竹枝
羨君獨倚篷窗坐一任蜻蜓立釣絲

題梅豹方十六羅漢畫冊

梅生解盤礴人物雅推雄前身受具戒曾入兜率宮失

足蹋塵網竭來東土東猶記諸應真寢寐嘗過從靜炷
一穗香想像龐眉客心手忽融洽不著臨撫蹤或守跏
趺坐或倚支頤筇或揮寶華巾聚立談宗風稜稜瘳露
骨氣象迥不同是間有妙悟變化由襟習俗云倣龍眠
此評恐未公若人愛畫馬幾墮馬腹中晚節雖小悔何
嘗得真空梅生根器殊筆墨超人工髣髴省本來一
洗畫史庸以畫作佛事脩然證神通

寫家書訖遂批一詩於後

家居山水窟游息無不宜至今旅館中夜寢猶憶之恒
虞春雨多土屋或易敝及此風日佳苦蓋安得遲徑草
須屢薅籬槿須牢支橘蠹菜有蝗次第當剪治辛夸好
在無高花玉差差此樹吾手植溉壅必以時申寧責家
人柰何飽而嬰拂衣具扁舟止足吾所知筍肥蕨芽嫵
社酒行可持杜宇女勿憂吾方戒歸期

寄題鮑聲來草庭

鮑生嗜讀書書室開南榮梧石羅四周清陰覆門衡如

何了不顧而以草名庭草類區以別剖晰不厭精蕝藜
善蔓延蓬藿易縱橫葶藶苦如檉薪藟甘似飴此茺差
可染菟葵略堪烹芡蘭本非蘭堊草本非薜凡此皆惡
種詳在爾雅經生也愛芳草辨之已分明種植與溉壅
往往手親營露濃翠甲滋日煥珍芽萌晨夕觀物變采
香掣其英陶令藝籬菊湘纍佩畦薺二子不偶俗晚節
尤惇惇生也生東南才穎超楚僖行脫薜荔衣翻然出
柴荆空留庭前芳搖蕩春風輕

題江干阻風圖

雲如崩山掩寥廓長年譁言風信惡捍索纜收百尺蒲
蚤見顛風轉旗脚大船邪許橫沙洲小船掀舞江中流
前頭麗譙定何處計程知是潯陽樓樓外江豚吹浪急
無數檣竿嘯空立風波如此路行難寄語兒曹勿輕出
繪川書院為湯潛菴先生賦

孔孟不可作六經無完書為學貴自得耳食真鄙儒宋
賢闡絕業已獲龍領珠從入雖有歧根源亮非殊後進

未升堂論辯徒紛如彼此藤口說孰若勤菑畲先生奮
中原祖程而彌朱貫通諸家學剝膚茹其腴首斥華士偽次
憫鯁生迂不朽在立德其言與之俱琬也東南來元如極株
拘浮沈章句中又似忘歸墟側聞繪川瀕高覺卓通衢豆
登仰前修生徒盛簪裾誦方歷歷揖讓兼于于杏臺一枝春
爛漫開榛蕪先生隱金門喟然歎歸與願言從執鞭住賃堂廡
居廁身都養末從容牖頑愚庶幾遲暮年猶得秉燭趨

奉贈徐健菴前輩

婁水之所經嵯峨玉山塔羨此一隅地人傑踵相躡公
家伯仲叔損篋互酬荅翩然排天門聲望後先接中朝
共推仰號為冠蓋甲長公最雄邁戶外朋簪盍慰問傾
篚篚宴笑倒樽榼頻躡長者履且置諸生榻辟若大瀛
海衆流鮮不納曾期極瀟灑經術沉淹洽觀其所著書
無語官落夾壯采陳繪組宏音振鏜鞳當今右文時

詔修經國業已開蘭臺局匪但給筆札前史頗浩瀚殊
論苦未協學識如長公才又富開闔發凡必超妙寓思

當周匝下上三百載歷歷在眉映何不任著述俾作羣
賢法幸紬金匱餘奴僕命壽甞

過談家莊始有店花時距穀雨僅七日

纔賣饅饅餐酪粥江南花信紛相續緋桃素李無數開
社鼓藜藜酒新熟燕齊之間春最遲若按月令斯失時
篋中袂衣空復在至今猶著羔羊皮鳬翁鴨子繞沙紫
唳鵝流鶯不到耳清明已過穀雨來甫見店花初放藥
安得歸颿乘便風故鄉節物兒女同豆筴離離眠地綠

金史卷四十三
櫻桃累累壓枝紅

舟中終日食韭偶作

長安早韭驚黃色雪花飛時圻土出菜市街頭初上市
每有豪門厚酬直河千半月春風吹韭葉尺許何離離
貴人吐弃不下咽老夫甘之如蜜飴午餘新黍炊香飯
配以韭羹寧待勸專絲箭出未足方欣然舉箸空盤案
偶謝微官還故鄉但得一飽百事足茹蔬噉糲不須擇
底用流涎思萬羊

重三日作

三月三日清源驛
臨門水淺纔及尺
老夫怕蹋軟紅土
卻向清源作羈客
臨清士女不好事
水邊初無麗人蹟
映隄綠柳垂陰陰
浴灝花鳧飛拍拍
悶來聊醉市上沽
倦甚但展牀頭席
安得捩柁開希颿
閒天烟波半篙碧

舟中飲酒

月黑風愈高
雲腳垂到地
繫纜楊柳根
搖曳頗可畏
蕭蕭

然揜蓬窓客悶排不易從來魯酒薄況復出却肆沾屑
取微醺過此卽少味譬若仕宦中沈沒何所忌夜深鐙
火闌並船皆熟寐挂颿理烟漿姑俟明日議

荊門侯啓牖得食鯖魚

斗門縣飛流一片浪花白樂哉羣魚來躍起每踰尺何
人腰笭簪舉網三玄鯖柳條貫其頰作意猶跳踴欣然
呼買之頗覺芳鮮溢我家太湖尾素富魚干石或園而
縮項或狹而豐脊曝腮或含紅細鱗或灑墨平時風月

佳恒有所鱸癖自從入京華此味竟難直今宵享南烹
乃得棄官力滿引蕉葉醖醉倒於樓側

濟寧太白樓其碑記為吾家文節公所作

先生本非狂古之天人也至今矚遺像丰采猶瀟灑憶
當供奉時才譽傾朝野高標南山松駿氣西極馬勲名
不能羈況乃富貴假一醉詩百篇吐納皆大雅吟然鐘
呂鳴餘子皆啞啞遊戲酒人中夫豈沈湎者遺趾任城
隅十年搆廣廈隱隱面層巒鱗鱗俛萬瓦尊醞時見酹

碑文每爭打神爽游八極垂雲儻來下

夜雨

草際捫龜鳴林陰姑惡語蕭蕭荻葦聲
送此打蓬雨珠梅牖前夜半行小艇點水如蜻蛉
平明日出烟霏歛望見淮山一抹青

高郵湖

蒲葉未生菰未長魚鷹飛飛來復往
桃華水至游鱗多爭向中流蕩
雙槳朝來捕得數斗鮮付與估客不論錢

但祈新嘯魚苗大便是湖村小有年

與覲侯入含山登一小邱有石刻題曰殤兒王

五郎墓

面湖背崦峯崔巍不知誰塋土一坏王郎定是玉雪子
吁此體魄歸蒿萊下殤胡為禮不殺特建短碣移松栽
夕陽飛蜨低荏苒月落杜宇號裴回即今秋色繞楊樹
無數黃葉堆蒼苔年年寒食梨花發紙錢麥飯何人來
嗟予中歲屢喪子亦復餘淚沾雙腮布帷翩翻寄村舍

瓦棺次第栖山崖人間此恨遣不易頓令目暗須皚皚
與君歎息殊未已西風忽蕩松風哀

藤樹歌

有小序

古榆一本有藤纏之頗若人力編緝者土人呼為藤樹
天王寺松石公石此榆怪甚乃其敵橫柯偃蹇春復春
綵陰盤盤白日昏脩藤出奇與榆角娛葉繇稍相束縛
歷年不知踰幾何樹紋絕似絲繩絡久疑造物之有無
今歎此榆天巧殊安得良工筆力活寫配松石作三絕

洞山

輕雲霏霏不成雨
天風駕我洞山去
盤空曲徑遠橫翠
迸壁細泉旋滴乳
山中風物故翛然
綠毛老仙不知處
玲瓏古竇栖蝙蝠
夭矯脩藤竄松鼠
松間藏丹好在無
憑誰乞我刀圭許
我欲徑肩長柄杵
來斲層嵐撥烟土
茯苓如人杞如犬
玉延之根大如股
他年服餌生羽翰
儻藉姓名書洞府

大龍渚

往年龍渚下陽侯頗為虐垂風駕怒濤澎湃穿石脚水
石互吞吐中有大聲作嘈呖而鏗豁相應儼奏樂今年
秋不雨湖流數尺縮不暇閉奇觀一一通戶鑰此是龍
所家定役神力鑿鑿若老蛟騰森如奇鬼搏大石最峻
嶒小者復秀削幽竇誠窅深平陂忽開拓徧黏漪澌文
或挺芙蓉萼曲折境屢變來游每驚弔始知人世別
自具邱壑嗤彼甲乙選品題未云確

游石公山

微雨夜來歇初陽麗峯巔綠蕚蕩寒流盧橘藹輕烟欲
盡所歷妙有興止復前石公最蒼秀獨立俛平川露涵
葛花紫風送禽語妍絕壁眇千尺惟有蝮獠緣我將巢
雲松於此求長年仙人儻可呼騎鶴來踰蹊

蒙吳公紳索洞庭游橐賦此寄

平生愛山看不足支頤遠望西山麓今年身似不羈鶴
竟理飛颿挈行襪山中佳處推石公俛視羣峰皆婢僕
怪奇自是驚心魂秀麗真能撲眉目橘林璀璨步障錦

雲巒宛轉屏風綠天風不起鏡流平展盡生綃三百幅
老僧知我非生人炒栗鬻茶頻見肅枇杷花開雪滿路
點綴衣巾猶馥馥危橋夭矯曲洞幽別逐行滕恣探逐
洞裏仙人不我瞋徧啟窻櫺驅蝙蝠數堆石髓堪采喫
味美勝餐玄圃玉從今解笑嵇叔夜俗骨塵緣無此福
歸來恍惚夢中遊欲記旋忘十五六明春約君共長往
拂石更題招隱曲

送宗人舟次出使流求

同館四同姓聯行若鴻雁推君尤傑出夙昔妙辭翰方
葺明陽秋聲望甲東觀史筆有無長紀表志傳贊公暇
複製詩信手龍蛇攬烟墨之所到終篇無點竄吾儕適
旁睨重裘透慙寒由此邀

主知

天語屢嘉歎邇者稱王人尅期涉浩瀚破浪長風中要
醕壯夫願玉韉錦麟袍新從

御前換東閣梅未花畫錦達里閑長官負弩天駟騎填

驛岸瓜步隸山間父老夾道看去作萬里游奇絕平生
冠黿脊高于山鯨目爛如電日月沐浴處試倚柁樓翫
水天略相接積氣眇難判欲求彭湖嶼遠碧浮一綫始
知木玄虛所賦曾未半乘槎亦吾心惜受老疾絆佗年
待君還雞黍尚可辦當於談笑餘歷歷徵變幻橐中奉
使錄技讎應弗憚

題喬石林像

我開海陵北河隄久無功虛糜水衡錢誰能啟

宸聰何不繪先生抗論承明中我聞射陂南水木紛清
華結廬水中央早梅萬株花何不繪先生歸棲畫川涯
展視圖中人政爾趨供奉隱隱長樂鍾似逐街鼓動螭
頭香霧濃仙掌露痕重訖今憶觚稜恍然一噩夢不如
卷朝衣徜徉水雲間輕撓縱所如臥看江南山

題梅花橫軸

水南有梅花水北有梅花於時雪始融蒲柳猶未芽伊
誰置斯亭景物迺爾佳亭前與亭後老榦紛槎牙素屏

斑竹簾遙映橫枝斜亭中哦詩人岸巾翫春華香風撲
衣來所享良已奢不問溪橋滑不愁溪路賒寒驢洵多
事牽去還鄰家惟愁月明時無酒澆寒葩

贈張銓侯

虛庭蔓草秋茸茸忽然幻出高低峯雲根槎牙叢篠密
直疑天造非人工張君巧思已臻極關鍵妙與文章通
回旋映帶絕有法嗤作小技緣愚聾往年供奉暢春苑
一一結構起凡庸水流千盤山百轉無數蒼翠排晴空

架巖透谷開

輦道彷彿仙島環離宮竊聞

至尊屢嘉歎一笑顧盼回重瞳西山之材本頑礦略加
驅遣俱玲瓏此間拳石易易耳指揮自覺神從容一邱
一壑未足道定有三山五岳蟠胸中

送林吉人歸閩

君家意氣殊磊落儒術尤能紹家學相逢握手各欣然
不分今朝完宿諾前年四月君初來梧桐葉放陰侵苔

子規聲中趣歸櫂匆匆僅把雲巖杯去年臘月君復至
枇杷花殘雪覆地與君共對五辛盤掀擲不惜通宵醉
雞籠山前鳥徑多垞南垞北紛烟蘿筍輿竹杖游未了
其奈寢中鄉思何老夫耄矣拋殘祿惟抱遺經守空谷
區區樸學待君傳還鄉勿厭專耕讀青山一髮東南陬
遙望征帆不可留欲知後夜思君處人在山光塔影樓

贈勒石顧生

顧生運刀如運筆能將紙墨登玄石胸中爛熟二王書

何論銀鈎與鐵畫鋒力所至疑有神波磔縱橫俱逼真
觀者摩挲三歎息人間絕藝推斯人顧生撫勒真好手
細字如蠅大如斗儻鐫

聖主登封文勲德定然留不朽君不見朱靜藏伏靈芝
至今名氏千年垂

堯峯文鈔卷四十三

欽定四庫全書

堯峰文鈔卷四十四

翰林院編修汪琬撰

今體詩一

共一百
十二首

送人南游

長路應難問君行況及秋不知葭莢外何處泊孤舟遠
樹連雲起殘潮漾月流可堪南去雁併作客中愁

王授玉讀書張園

羨爾幽栖地迢迢翠靄中山臨茶磨北路繞酒城東語

鳥千聲合飛泉一道通春來風日好登眺與誰同

題露筋廟

貞女今何處蕭條水殿扉朱顏空想像白鳥尚翻飛極浦荷花豔虛庭竹翠稀應嗟楚臺上行雨獨忘歸

河神廟

前代遺靈在森然曳冕旒拜瞻紛估客歌舞祿巫優賽雨來春社分風送曉舟文螭如可駕髣髴護安流

送吳處士二首

木落雁南飛，秋深每憶歸。
那堪一尊酒，重與故人違。
戍連平楚，江城閉夕暉。
綿綿往來道，遙望欲霑衣。
故鄉風物好，及爾客歸時。
芳草蘭陵鎮，丹楓太伯祠。
海雲盤鶴影，湖雨長蓴絲。
若問生涯事，扁舟任所之。

送再從姪處默

又向長安別，淒然動客愁。
秋風吹遠道，落日在孤舟。
雁逐江烟下，潮衝楚樹流。
何時更相見，與續竹林游。

重送處默三首

還家正及石湖秋蘋葉菱花兩岸流我亦湖邊舊游客
欲將歸夢寄行舟

秋風倚櫂女墳湖好為秋孃過酒壚試問門前烏柏樹
夕陽猶似往年無

七月江南陰復晴儂家種秫近秋成但教釀事麴能了
我欲歸來荷鋤行

巴州歌二首再送陸知州

滕王亭子與雲齊千尺朱闌萬仞梯無那使君登眺處

滿檐山色杜鵑啼

已女燒畬劍水邊
已兒醉舞玉山前
琴臺鈴閣清如水
簾外無人訟芋田

送人之越中任

祖帳酒初醒
輕帆不暫停
家山虎邱寺
驛路鮎埼亭
曉日江烟綠
春風海嶠青
行逢朋舊羨
高第在通經

皇帝行幸歌二首

金殿初開鹵簿長
詞臣扈從儼成行
不知玉輦游何處

惟見旌旗出建章

天壇南望瑞烟多
柳色陰陰接玉河
芳草不生沙路淨
九重法駕日經過

寄贈吳門故人

遙羨風流顧愷之
愛翻新曲覆殘碁
家臨綠水長洲苑
人在青山短簿祠
芳草漸逢歸燕後
落花已過浴蠶時
一春不得陪游賞
苦恨蹉跎滿鬢絲

同洪儀曹暨族兄湘鄉使君飲

望縣分符客清曹下直郎花辰催緩帶菜甲佐傳觴風
土近寒食山川鄰夕陽相看倍惆悵明發異行藏

調薛戶部大武

十載雕蟲稍擅名未曾縛袴學長征佗時若得登三事

但乞蕭郎作騎兵

薛嘲予云異日我如嚴鄭公
汝當出我幕下故嘲之云云

咏古二首

羽林千騎蹋輕塵狐兔初肥苑草春試問茂陵移病後
車前諫獵復何人

仗劍撲丸意氣生五侯賓客太從橫不知猶有張公子
日暮人間借姓名

送友人之楚

十載滯長安那堪旅騎單家貧輕久客世難悔微官夜
雨江聲急秋風蕙草寒尺書何處達遙望楚雲端

懷從叔川中

憶自滄江別秋風淚滿衣已嗟行路遠況復寄書稀雪
盡已流急雲淡棧樹微相思如杜宇長繞錦城飛

贈程五舍人二首

三年旅食厭風霜初掌絲綸直建章
過嶺梅花鄉夢遠翻階芍藥畫吟長
承恩祇在金螭側賜對頻依玉几旁

故舊彈冠誰最切欲修書札報維揚

落句維揚指王揚州

宮鶯高轉萬年枝才子為郎退食遲
垂袖內家催應制珥貂中監乞題詩
月明寓直趨鸞掖日晚濡毫對鳳池
同作金門供奉客馮唐獨媿鬢如絲

送陳給事之任福建

掖垣風采百僚聞特領雄藩到海濱
藤鳥竹雞啼暮雨蕉花橘實映斜曛
羽書競逐征南府芻粟遙供下瀨軍
但使閩江無戰伐漢廷先論轉輸勲

送蔣給事之任九江

暫辭封事賦南征騎吹譙關按部行
峯疊似屏圍楚塞水流如帶繞湓城
渚邊蘭杜紫離恨江上琵琶感宦情
最是庾樓宜夜月且停清獻一論兵

世祖章皇帝輓詩二首

已致昇平祚兼高孝治名彌留念

文母倉卒託阿衡

寢殿陳龍輶離宮徹翠旌猶傳臯已詔嗚咽走蒼生

南苑停調馬東邦罷貢鷹車書方正統弓劒忽遐升玉
几嗟空設鑾輿億舊乘蒼茫哀痛日大誓復金滕

送王六助教往山西程五舍人往山東是時齋

世祖諡詔出使也

手奉綵綸出薊邱煌煌幢節引雙駟

南郊共冊

天王諡

北闕分馳使者郵齊晉祇今稱大國

王人自昔冠諸侯溪山父老如扶杖為報姬公佐委裘

無題一首

故宮高與碧山齊無數垂楊接御隄玉輦不來花落盡
晾鷹臺上鳥空啼

寄訊西山隱者

高士荷鉏處迢迢西澗中不知夜來雨藥苗生幾叢鳥
道挂斜照樵歌陵便風問君灌園下登眺復誰同

春夜望月

客居如空山風物澹欲絕返照既已收餘靄旋明滅冷
泠冰下泉了了松間雪相對寂無言禪心與初月

賦得宮人入道二首

翻因薄命愛長生羽氅雲冠再拜行曾被玉皇教按曲

忽隨金母學吹笙
顏逢鍊液重疑豔
身為持齋轉覺輕
從此幽栖如野鶴
萬年枝上月空明

自乞天恩下玉墀
宮中女伴鎮相思
羞題紅葉傳塵世
願守丹爐事本師
垂手只攜襖斗訣
點唇初習步虛詞
此生無復昭陽驛
猶為君王夜祝釐

罷官後攜三女南歸三首

嬌女由來字蕙芳
解牽衣袂學扶牀
逢人也說還家好
松菜青青橘子黃

紅蓼花殘稻穗低
蕭笳聲滿村溪
且隨漁父攜家去
一曲吳歌笠澤西

鷓鴣纔鳴雁又飛
已拋父綬製荷衣
出門即是還山路
底事游人不肯歸

揚州懷古襟詩四首

水調歌殘翠黛消
幾枝烟柳曳寒潮
隋家何限傷心事
第一休過廿四橋

豔骨香魂怨月明
荒村賸有玉鉤名
春風吹遍青青草

直到雷塘不斷生

水殿花飛杜宇愁
木蘭亭下咽寒流
無人更唱安公子
紅蓼青蒲兩岸秋

瓊花摧折玉鉤荒
后土夫人寢雨長
惟有田家逢社火
競吹笙笛逐韋郎

過江距廣陵三十里值暮雨

天陰生暝寒
旅舍傷寂寞
微雨江上來
江村杏花落
燕歸柳塘社
漁返瓜洲郭
何處遠鐘聲
孤舟宜早泊

曉發

舟人不知寒解纜陵清曙隱隱月墮水翻翻烏繞樹烟
連甃社生潮入蕪城去一任孤颿行沿流向何處

讀楊廉夫竹枝詞擬作四首

春雨春風太作顛桃花結子柳飛棉小娃十五猶愁思
那得吳孃不化烟

家住橫塘倚畫樓望郎遙隔百花洲何時得作橫塘水
匯入洲中一處流

兩兩吳娃結束同競呼畫舫趁東風白堤玄墓花如雪
春在蜂黃蜨粉中

虎邱寺西春水長郎船簫管出山塘勸郎莫上真娘墓
阿孃元是狹邪倡

由虎山橋入朱墓邨

新柳條垂着水齊畫船行傍虎山堤卷簾漸覺香風入
一路梅花到崦西

送許竹隱之任思州四首

斑馬錦障泥經行桂嶺西
楓人逢雨長木客傍雲嘯
土俗三相接山川百粵齊
烏蠻迎早蓋一一繞龍谿
一官何足問迢遞瘴江濱
人習娵隅俗禽嘯格磔春
金蠶爭事蠱銅鼓共祈神
為報諸君長于今漢法新
憶昔慈仁寺相逢盡酒狂
故人推大令才子數高陽
語笑松壇暝招攜柳陌長
那堪回首處三載各蒼茫
客路荆榛滿長途雨雪滋
當予去官日值爾遠行時
芳艸投書渚叢篁鼓瑟祠
好從登眺處遙為寄相思

題藏佛寺

此寺何年構荒臺倚翠微花殘鹿女去松偃鶴雛飛香
積餘烟在禪燈舊焰稀祇應江色好水月共凝暉

虎嘯寓廬四首

并序

予自罷歸以家貧售故居於人寓身虎嘯有破屋數間
荒徑一區比於僧寮逆旅其地蓋割張氏園居三之一
也未及葺治會左官北上時時懸念於懷舟中無事遂
為此咏傳之好事

竹徑

絲枝烟外綠新籜雨中斑恐有肩輿客柴扉晝不開

梅鵑

寒梅欲吐香陰雨如相忌昨夜月明多踈籬花發未

菜畦

葉綠蟲生翳花黃蜨引羣西山晴氣爽抱瓮敢辭勤

豆架

涼颿繞架飛子老白花稀莫即除霜蔓寒蛸正脫衣

舟次有客攜鰲赴北子聞其聲誌感

孤鰲何自至入夜最淒然心逐巴江樹形羈楚客船遠
邨雲外火極浦雨中烟愁絕號聲急殘鐙不可眠

咏雀

賦質何微細卑栖自不辭引雛銜短穗趁侶上枯枝叢
薄寒烟靜茅檐夕照遲此生堪止息未用徙天池

咏雁

念爾南飛志寧將燕雀同相呼葭莢外羣飽稻梁中天

潤頻趨暖秋高卻趁風羽毛非不健儻遇弋人弓

寄劉丈二首

水郭山邨處處春
梭韎藤杖自由身
頻持般若經中偈
常作者英社裏人

宰官何異在家僧
遙念南邨舊日朋
女嫁男婚都已了
好來對禮佛前燈

送人南還

垂楊綠未齊
千里惜分攜
雁去榆關北
人歸笠澤西
潮

平芳芷短飏落夕陽低到日逢修禊蘭亭續舊題

聞計孺子殤寄甫草二首

筆冢累累硯欲穿每將文字苦雕鐫著書也被天公惱
不使童烏與汝玄

帶草侵堦樹拂簷架中零落舊牙籤謝娘他日聯新句

更有何人唱撒鹽

甫草有女曾
許予亡男衡

拈花頌呈聖禪師二首

默然相向寶蓮臺觸處天花爛熳開翻怪世尊多事極

無端拈出一枝來

饒伊拈出總無干平地戈矛起禍端畢竟瞿曇元未徹
至今箇箇被顛顛

送聖禪師遊五臺二首

翻然如野鶴矯首忽西行花雨諸峯暝松風六月清
往來非有相登眺不論程欲識文殊境微茫磬一聲

見說心無繫悠悠道路間雲歸獅子窟日落雁門關
洗盥承飛瀑尋鐘蹋亂山宰官方惜別杖履幾時還

計甫草至寓齋二首

門巷何蕭索惟君步履頻青雲幾故舊白首尚風塵身
受才名誤文從患難真耦耕知未遂相顧倍傷神

聽話頻年况淒然淚不禁歲荒生事儉世難客愁深孝
友安時命文章損道心五侯空好士歎息少知音

和李退翁侍郎讀水經注憶洞庭之作用原韻
曾持使節遠揚舲落木層波共杳冥澤畔有人哀郢客
雲中何處降湘靈雨過斑竹千叢綠潮落芳蘭兩畝青

回首舊遊今阻絕不堪寂寞對遺經

漫興

几是烏皮杖是藤十年身計百無能飄零已作風中顚
痴鈍真如凍後蠅愛著龐家居士服擬參慈氏法王鐙
回思少日空豪俊紉犬呼鷹上五陵

贈南員外家歌兒二首

員外渭南人

聞道秦箏最有名秦兒玉雪可憐生自從偷得江南曲
不愛伊涼隊裏聲

洞簫一曲共關情
白髮吳儂感慨生
記得虎邱明月夜
劍池側畔按歌聲

出西便門至豐臺

東風又見一回新
偶趁鶯聲上轎輪
芳艸綠于南浦水
桃花紅似去年人
幾家籬落雞催午
十畝陂塘燕蹴塵
檀板金尊隨地好
不須料理欲歸身

送周提學

白頭郎吏出燕京
遙指青徐擁轡行
池面雨過芹菜長

壇前春暖杏花明
濟南自昔多名士
魯國何人似兩生
早晚東封須頌記
看君起草候霓旌

章含可畫冊四首

孤塔峙斜陽
遙邨隱芳樹
彷彿石湖秋
支筇茶磨嶼
繫艇菰蘆中
漁父眇何在
任爾行人呼
得魚亦不賣
斑竹繞層岡
紫蘭被芳渚
寂寞黃陵間
無人弔堯女
門外槿籬斜
東風吹柳花
微聞漉春酒
好是隱君家

離宮怨二首

溪鎖宮門歲月遙
玉顏狼籍黛痕消
如何輦路垂楊柳
猶向東風鬪舞腰

經年無復翠華來
歌譜雖存已倦開
學得霓裳渾忘却
鈿箏斑管兩塵埃

漫興三首

襖襪叩門何可耐
號繞戶若為聽
眼前俗物敗人意
拄頰且望西山青

累累簿書堆滿案
紛紛胥吏立盈前
痴兒不了公家事

但乞旬休企脚眠

東華塵土浩濛濛願借糟邱慰旅窮
勸汝莫拋車壁歎一杯濁酒勝三公

夜坐襍感二首

蕭蕭夜雨打窓時酒冷香殘夢覺遲
往日風流都減盡只慙猶未遣楊枝

十載郎潛事業非夢中猶戀舊漁磯
銅駝陌上秋風起不為鱸魚也合歸

送錢武子南還二首

桃花時節綠波長，便逐輕舠返故鄉。
次第江南風物好，紫魚出水笋捎牆。

華亭谷中好，山水上策無。
如荷耒耜耕，不然樣却吳淞棹。
網鰕撈蝦餞此生。

河亭五首

公勇招客與貽上周量子
端同賦孟夏前三日也

綠波如縠柳如絲，取次鶯殘燕乳時。
怪底老夫心事惡，當筵催賦遣春詩。

一路輕陰護酒家
酒旗低亞曲中花
不知門外何年少
柘彈斑駁問狹邪

下馬來傾白玉壺
醉中容吐錦茵無
主人大是丹青手

乞取旗亭賭酒圖

公勇故善畫

一曲新歌阿鵲鹽
折花都作酒籌拈
柳條無賴知儂意

也挽春雲宿畫檐

是日天陰不雨

去年郊園折紅藥
今年河亭攀綠楊
歲歲春風相觸撥

老夫那減少年狂

題王十一畫冊二首

數點彤雲向晚收
梅花和月蘸寒流
溪山風味佳如許
合付蘭橈與竹兜

間臨承旨筆端春
吳下風流最可人
大似鷗波亭子外
柳花漠漠水粼粼

題鄔陵梁曰緝江邨讀書圖四首

約取春江入畫圖
亂紅殘絮擁菰蒲
鄔陵野色平於掌
也有江南此景無

門前花發柳毵毵，若箇能停載酒驂。
暫次齋中無一事，

焚香親校貝多函。

日緝博通佛經

一自吳儂別釣磯，久將痾骨裹朝衣。
妒他花鴨春江上，日唼芹花自在飛。

衆鶯吹波上綠蘋，恰逢三月石湖春。
期君共蕩雙蘭槳，茶磨山前結比鄰。

再閱江邨圖不勝歸與之感得詩二首

綠暗紅蕖邨路長，如聞杏粥麥餠香。
今年又負歸耕約，

却為丹青憶草堂

浩渺滄波漫翠微
漁菴樵鵑兩依稀
先生尚念江南樂
那得吳儂不夢歸

題與也畫二首

蛛絲煤尾比琳瑯
待詔丹青少抗行
今見耳孫揮綵筆
風流回憶玉蘭堂

君家道韞擅才華
愛寫徐郎沒骨花
曾向兒時窺指訣

筆端桃萼一枝斜

與也有從姑名假字端容
嫁趙氏以善畫花鳥得名

題禰畫三首

最好春光冷節前
小桃初弄一溪烟
隔離猶子迎人吠
定是鄰翁掠社錢

深秋風物數江鄉
楓葉蘆花正著霜
未放歸舟先一笑
畫圖喜見石湖莊

漁父臨流卷釣絲
恰逢渡口雁栖時
月明忘却風波惡
獨叩船舷歌竹枝

題畫松

山腰長松接山麓何人構屋相因依
鶴鶴忽來雲冉冉鱗鬣欲動烟霏霏
厚粘艾納數重綠潛結伏靈三尺肥
愛爾盤枝如屈鐵不隨凡木爭春暉

見貽上題江邨圖愛其江鳥江花之句以詩識
之二首

曾向澱江漾酒船舊游回首故依然
囊中攜得郎官筆重寫江南上巳篇

彷彿春江綠樹陰幾回展卷幾沉吟
江南於汝關何事

賦得愁心爾許淡

堯峰文鈔卷四十四

欽定四庫全書

堯峯文鈔卷四十五

翰林院編修汪琬撰

今體詩二

共一百十二首

贈劉吏部

門前軒騎寂無聞
下直翛然坐夕曛
竹竈煮泉風謖謖
墨池飄絮雪紛紛
千年漢鼎瓜皮色
百番唐箋魚子紋
除却焚香賦詩外
可容好事訪楊雲

題武曾灌園圖五首

白柄長鋤手自攜
露葵霜薤滿秋畦
時時小摘供親膳
也勝茅容度半雞

雨過籬落土膏肥
嫺綠叢生隙地稀
不用園官供菜把
渾家摘得滿筐歸

菜畦新熟歲將除
老圃安閒樂有餘
擬配香杭須底物
一年佳味是冬菹

謝却東華輓土塵
竭來江畔鬪閒身
閉門鋤菜英雄事
不信菰蘆有此人

經營擬作漢陰人笑汝家徒四壁貧何不具舟淞水上
秋風隨意採絲蓴

冬日偕友人即席分和杜子美秦州雜詩韻各

二首送董御史之任隴右

得莽莽萬重山東柯好崖谷二詩

此地一分手鼓匭坂谷間朔風吹隴水
戍火散秦關直道寧辭黜孤踪不易還
道旁風雪甚恐損逐臣顏

未盡一尊酒忽忽背雁羣西征方絕塞
北望祇浮雲羌隄風煙別燕秦道路分
好留封事草萬一

至尊聞

先是董以地震求言嘗上疏極論時政故云

題獨鶴亭圖四首

倒檜枯杉侵澗壑
小紅疎翠點柴荆
獨來倚杖看山色
一朵蓮花潑眼明

擬共幽禽占白雲
玉泉瑤草隔塵氛
平生解笑天隨子
但養能言鴨一羣

月中松露墜無聲
誰伴閒吟永夜清
自是長身古君子
與君能締歲寒盟

華山人不在山鶴聲淒切望君還青鞵布襪且歸去
對獻蒼松錦石間

題徐畫二首

碧花紅穗及秋晴無數寒蜚趲行借問爾曹綠底事
西風也作不平鳴

風吹黃葉影淒淒金井霜濃月漸西不見朝陽舊時鳳
夜闌惟有乳烏啼

汶上晤宗人交臣

相見忽驚喜相邀意更真須康俱老大薄領各風塵魯
酒不辭薄吳歌寧厭頻盤食兼語笑笑差慰倦游人

汶上入田氏園賞芍藥與同宗諸兄弟飲二首
塵中驅馬已十日急雨顛風不可當不信南來好天氣
徑容闌入藥欄旁

無數名花壓徑開暫攜濁酒為花來帽檐敲側觸船覆
始信吳儂爾許欬

題亡室袁宜人小像三首

露重霜濃蕙草枯夢中相見亦模糊鏡臺脂合都無了
留得梁家舉案圖

宦情家計兩茫然白盡頭鬚劇可憐使汝今年猶健在
定應相勸賦歸田

春風一十一回新惟見丹青舊日真閒却從前畫着手
教渠捉筆向何人

再題灌園圖冊二首

家鄰長水上隙地作平田紺甲和泥迸黃團繞架懸鋤

時新趁雨汲處舊瀦泉若著山居稿先將蔬譜傳

陸種青松水種芹也須竹石兩三分小園位置麤能了

我便輕舟一詣君

東歸道中三首

鴨鴨聲中雨似絲昏昏鄉思苦難支
棟花風起歸舟急要趁黃魚上箸時

望見家山一抹青淡煙初日漾江汀
先生纔了還鄉夢已報輕颿過御亭

醉翻餘瀝浣征衣
喜向風塵暫息機
多少春明退朝客
十年曾有幾人歸

送北客二首

金陵店中美酒多
南人北人共經過
南人愛聽女兒曲
北人愛唱甘州歌

甘州一曲襍雲和
下馬勸君雙叵羅
歌聲未了弦聲絕
上馬催君北渡河

湖上竹枝詞二首

郎船繫在湖千樹逆風打頭那可開與郎相望不相見
恰似湖中大小雷

湖中白浪如雪堆長年楫柁聲喧逐逆風打頭會儂意
吹得郎船却倒回

到京師再題曰緝暫次齋圖二首

點染煙羸久擅場至今珍重貯巾箱笑君未辨雙荷葉
合付寧馨掣筆郎

斐几藤牀寄興賒每披橫卷翫煙霞平生長物元無幾

配我徐熙落墨花

予橐中攜有墨菊卷

曰緝和予請告詩至因次韻答之

謬忝朝參幾歲華漫推文賦麗雲霞

先生有海內文章之句故云不

才悔起郎官草屨老羞攀杜曲花松菊尚存堪閉戶江湖無恙且浮家應同摩詰空諸有示疾聊將衆眼遮

筠兒書來云料理草堂麤竟因借前韻賦此寄

之兼簡曰緝

矮屋顏垣了不華馮將曲折貯煙霞須扶醉日移來竹

急護分前接過花，但剪蓬蒿開客徑。莫驅鵝鴨入鄰家，
歸來夢斷長安道。軟土生塵一任遮。

題小像三首

身在紛紛擾擾場，暫歸來炷影前香。老蠶作繭真難脫，
贏得霜髭爾許長。

建禮門前軟土紅，幾回聯騎蹋春風。而今卸却朝衫後，
同舍何人記此翁。

久與支公結淨因，分明偶見宰官身。何時并寫痴兒女，

都作無生話裏人

留詩奉送曰緝歸鄆陵三次前韻

一疏言歸連翠華

是時上方巡覽

翻然漱石飲流霞卷中書

繞江村屋門外山連嶽寺花枯坐却宜居士服清齋真似太常家御亭北望遙相憶惆悵寒雲極目遮

齊河道中二首

行客踰修嶺居人傍古原東林桑泊地土屋版橋村千里戍煙斷五更馱鐸謹白頭歸計切雨雪敢停轅

月黑鷄纔唱肩輿爾許忙
恩恩酬旅飯細細檢行裝
久客諳長道衰年怯早霜
淮暝知不遠極目興飛揚

繆家集

時聞
益警

獨樹欹沙岸疏簾向水涯
輪蹄南北道煙火兩三家
風急塵難靜天寒日易斜
健兒方賣劍行旅莫咨嗟

將到許墅有作

殘雪初融小艇輕喜聞乾鵲引雛聲
宦游不耐羊腸惡歸去寧煩馬角生

予欲歸已久諸士大夫莫之信故有此句

京國久淹身欲

暮家山初見眼差明倍消結習忘機事鷗鳥相逢莫漫驚

抵家再次前韻

歸到柴門接歲華數聲烏雀噪殘霞欄前迸土穿階樂
屋角橫檐覆地花衰白不堪循短髮團圞何意見全家
里人若訊先生號只署頭銜是玉遮

先是予自號玉遮山人

襍興六首

有感即作語不詮次

車聲日夜闐騾騾染盡長安大道塵輸與繩牀籃輦攄

不知何苦作勞薪

一棹歸來未是遲
正逢江上早春時
柴門莫道都無事
酒熟花香恰要詩

東風吹雨浥輕塵
又逼條桑嫁杏晨
手把一鋤肩一笠
老來真作太平人

肺病經年強自持
閒居風味欠人知
鉢心擢腎俱難事
只役鶯花入小詩

芒屨迢迢杖斑斑
隨意山邨水郭間
判却去官兼謝客

乘除偷得十分閒

誰家惡少語聲謹牢挂雙扉塞短垣老子元無君輩客
不須哆口恣瀾翻

咏懷二首

年年客路蘇門西何幸歸來守故栖文字只如木有癭
功名都是絮沾泥籬東照眼花千本壘土關心雨一犁
老去襟期如此足不須騎馬聽朝雞

海鷗遠逝鶴高翔從此麤將願力償已遣掃除新藥徑

別教檢點舊巾箱欲移小樹多芟竹恐碍前山短著牆
更有耗磨衰景處往來頻在贊公房

過西園

松路榛門接細岑水清石瘦却幽尋潛龍尚有為霖勢
倦鳥初無擇木心聊借閒身供獻傲略扶病腳試登臨
遠公儻置蓮花社不敢攢眉問法林

興福塘

棧棹春溪上尋幽歷數邨縱橫芳草陌高下夕陽門社

後雞豚減花時
薺麥繇野翁頭已白
未識市塵謹

自雞窠嶺至天池

又踰前嶺去幽勝
轉難窮灌木啼搏黍
清池聚活東人煙
深竹裏樵徑綠蕪中
吾欲歌招隱須營地
一弓

雞窠嶺自嘲二首

蘿蔓每穿松腹出
葛花都給石根生
行吟纔到山溪處
已作吳牛望月聲

絕無驚兔與栖禽
怪石峻峻亂瀑深
仕宦險巇嘗未飽

更於此地試登臨

庭中綠萼梅始花二首是時春已半矣

雄蜂雌蜺不勝猜雪壓霜欺緩緩開本與春風相間濶
今年偏作杏花媒

黃鶯出谷燕差池猶有殘葩一兩枝煙柳露桃皆後進
偶然相值艷陽時

寄曰緝

女蠶初浴燕歸時乞得身閒校未遲花徑蓬門春晚晚

紙窓竹屋雨淒其病餘每倚過眉杖老去猶題漫興詩
似此風流相憶否一緘粗報故人知

遲日緝至

叢竹初生笋鰈花漸委苔故人敦宿諾倘命一舟來書
札能先報柴荆合暫開傳呼小兒女斟酌醅春醅

危坐

野蜨飛飛澗草香綠陰隙處射殘陽不妨危坐籠雙手
偷看營巢海燕忙

舟過鴨腳浜

柳外鶯雛弄好音暫牽畫舫入溪陰
棟花欲放黃魚美穀雨纔晴綠樹深
才少不堪文字飲興酣那惜短長吟
麥秋時節須行樂已分功名付陸沉

偶買一舟賦此

收得膠膠擾擾身苓箐簑笠五湖濱
羞為問舍求田計擬作浮家汎宅人
梅子雨過煙幕幕蘋花風起水鱗鱗
晚來樣棹村南北自鱸銀刀煮綠蓴

納涼二首

衡門兩版揜松風
葵扇桃笙偃仰中
就與劉孫相潤絕
不過令我不三公

科頭企腳向斜陽
畦豆盆花細細香
畫省才名拋擲盡
方能消受北窗涼

漫興

小徑疎籬苦未深
蛙喧雀鬧巧相侵
絕無小小周防策
真有沾沾自喜心
竹簟暑風敲枕卧
柴門月色杖藜吟

平生識字嗟能幾可要侯芭載酒尋

游陽山禱咏四首

大石

土垣竄鼯鼠石像蒙荆棘欲覓聯句詩殘碑無隻字

有先

賢李貞伯與吳文定公
聯句刻石為俗僧所毀

龍湫

一泓何黝深遊人每動色所恐龍子驚風雷飛白日

晉柏

修柯不知年疑有鬼神守至今龍蟠處蒼文尚左紐

岳園

岳名岱字東伯嘉靖間隱居於此其園脩竹萬挺春時生笋甲吳下

數易荒園主泉枯竹已花居人談舊事猶指隱君家

題佛印燒豬圖為予瞻解嘲二首

慙愧闍黎用意烹老饗差覺愜平生菜邊肉食真禪味
何似他時玉糝羹

任爇柴頭火候前坐中談笑各欣然也知不少鹽和醬
肯羨諸方五味禪

歲暮襍咏十二首

俠少場中氣寂雄而今飄泊等秋蓬
一雙種菜持螯手懶拓藍田數石弓

瓦上新霜點點斑籬門落木接溪灣
試擡頭向西南望剛露支硎半角山

一兩柴車一釣輪往還多在五湖瀕
平生骨相元寒乞領取頭銜是散人

乞得殘骸歲月更藥鑪茶竈鎮常清
少年婚娶中年宦

一笑明明是隔生

紛紛好事屢回車繞徑蓬蒿數尺餘莫道杜門真左計
要將菜飯了殘書

叢叢蘭蕙方抽萼淡淡茶梅漸著花春色不隨年歲例
破寒先到野人家

柏葉麻鞋繞戶新厯頭計日又逢春無才間卻毛錐子
賸寫桃符饒比鄰

朔吹將闌凍霧開春前風味亦悠哉韭芽松甲參差發

蝦虎鮪魚次第來

里俗紛紛須餽歲
官符續續要輸倉
先生也探梅花信
恰與兒曹一例忙

老懶情懷病發踪
故應墮戶與支筇
如何又被無生悞
賺入山僧保社中

燒燭初開守歲筵
眼中兒女笑相牽
乃翁不合時宜甚
猶撚殘鬚酢瓮邊

風流怕作噉名客
文字羞為賣菜傭
環海九州如許大

只愁無處著渠儂

予於苕華書屋後葺一小閤予居之

泥壁苔芽了悠然燕寢中夢應游蛭穴幻似入鶯籠
几容雙肘苔除受半弓猶慙病居士丈室出神通

出游二首

紫萼黃英雨後滋先生行飯少遲遲盡拈花藥供詩料
何異兒曹鬪草時

芳菲照眼遽如許魚鳥親人亦自佳老子於此興不淺

急營桐帽雙梭鞢

支硎

正直采蘭辰停橈十字津岸花紛似繡隄草輒於茵瓦
狗泥車市湔裙障裏入相逢不相識隨意各嬉春

楊鐵崖有

嬉春
詩

春寒

鳩語太怱怱春寒入病翁透支梅子雨橫卷柳條風遣
興詩猶作禁愁酒欲中客嘲多不計癡覺勝揚雄

病中示客二首

曲脚繩牀木養和終朝示病似維摩
殺風景事君知否
剛到花時伏枕多

愛靜每圖調急憤得閒兼學鍊形忙
漫苓一倒都捐却
免與庸醫試故方

卧起

細雨生寒恰及旬疏簾曲几病中身
每游栩栩遽遽境
長學悠悠忽忽人
小鳥窺檐疑熟識
繡花委地似橫陳

杜門善用平生短消受餘閒又一春

病後游慧慶寺二首

布穀交啼雨乍晴病身旋覺袷衣輕得間何處消清晝
惟向街南古寺行

寂寂精藍晝不開隔離飛蜨鎮徘徊醅釀芍藥怱怱了
猶有山丹侍我來

漫興二首

三月柴門氣味幽夕陽澹澹亂雲收飛來社燕方泥屋

移得山花半結樓客到暫籠鉏菜手詩成微掉墊巾頭
唾壺談麈捐除盡免使人疑第一流

十九年中歎數奇此身合與退休宜浮沉自慣東西陌
來往誰堪大小兒老作齊民差有術病看周易本非痴
縱令骨出霜髭茁也勝京塵扑馬時

花下招客二首

成團胡蝶繞芳菲籬落春深客到稀但使故人能叩戶
不愁羅雀要驚飛

賴有名花取次開
暫扶藤杖立蒼苔
雖然不識揚雄字
也望門前好事來

仲夏即事

衣裁白紵扇裁紈
又見黃梅雨候闌
長日好懷惟得句
暮年上策是休官
交頤瘦竹從容拄
遮眼殘書約略看
塵世窮愁真細事
不令輕易入眉端

暑睡甚美覺而咏之

北窗寂寂寄幽蹤
黃鳥無聲綠樹濃
已分新詩輕萬戶

更判美睡敵千鍾蒲葵越葛屨宜暑笛簟胡牀穩稱幙
自幸暮年諳此味故應忘却夕陽春

有客

有客是羊求從容竟日留清羹嘗馬齒珍味剝雞頭小
飲聊相對玄言必互酬晚涼殊快意未可賦悲秋

雨中秋葵

候至芭齊掃寒多色漸深兼旬陰雨裏孤却向陽心

蜨

蛻出翩翩影鬚拳粉未勻直饒能速化也是夢中身

淵明

先生洵是無懷民
藍輿往返潯江瀕
不知黃菊有何好
但訝白社無此人
雅琴寂寂每挂壁
破瓢黯黯惟栖塵
風流如許不可作
歎息南山山色春

讀宋人詩五首

夔州句法杳難攀
再見沿翁與後山
留得紫微園寢在
更誰參透少陵關

唱得吳歎迥不同石湖別自擅宗風楊元果與齊名否
如此論量恐未公

詩印頻提教外傳入魔入佛總超然放翁已得看山髓
不解誠齋學謫僊

後邨傲睨四靈間高與前賢隔一關若向中原豎旗鼓
堂堂端合讓遺山

一瓣香歸玉局翁風流羨與少陵同平生不拾江西唾
枉被勾牽入社中

題捉筆圖小像二首

墨池清泚硯山蒼
獨擁深衣倚隱囊
牛蜺任渠牀下鬪
先生只是著書忙

東塗西抹偶然閒
得失妍媸等是閒
文冢不妨隨地築
讓他兒輩占名山

又題曳杖圖二首

不著深衣不裹巾
衰年自要齒齊民
蠶經未譜裴池了
棟固山邛置此身

不學長生與苦空一邱一壑偶然中丹青未必能神似
更著新詩寫病翁

堯峯文鈔卷四十五